

इवनिंग डोगरी न्यूज़ बुलेटिन

समे-18:15 Hrs

<><><><><><>

Headlines

- गुलमर्ग च आतंकवादिएं आसेआ कल फौज दी गड्डी पर घात लाइयै कीते गेदे हमले च ज़ख्मीं इक होर जवान नै दम त्रोड़ी दिता ऐ जेदे चलदे इस हमले च शहीद होने आहलें दी गिनतरी बधियै 5 होई गई ऐ।
- सीमा सुरक्षा बल नै साम्बा जिले च बन्ने कन्नै लगदे इलाकें च तपाशी अभियान तेज करी दिता ऐ।
- भारत ते चीन नै पूर्वी लद्दाख च डेमचोक ते डेपसांग च फौजें गी पिच्छे हटाने दी प्रक्रिया शुरू करी दिती ऐ।
- प्रधानमंत्री नरेंद्र मोदी होरें आखेआ ऐ जे जर्मनी नै हुनरमंद भारती पेशवरें लेई वीज़ा कोटे गी 20 जहार शा बधाइयै 90 जहार करी दिता ऐ।

<><><><><><>

Baramulla-Attack

बारामूला जिले च कल आतंकवादिएं आसेआ फौजी गड्डी पर घात लाइयै कीते गेदे हमले च ज़ख्मीं इक होर जवान नै दम त्रोड़ी दिता ऐ जेहदे चलदे हून इस हमले च मरने आहलें दी गिनतरी बधियै 5 होई गई ऐ। बारामूला च कब्जा रेखा दे नेड़े बोटा पथरी इलाके च कल होए दे

इस हमले च फौज दे 2 जवान ते 2 पिट्ठु शहीद होई गे हे। कांग्रेस नेता प्रियंका गांधी होरें सोशल मीडिया मंच पर इस आतंकी हमले च मनुक्खी जानें दे नुकसान पर बसोस जताया। उनें सोगी परोआरें कन्नै हमदर्दी जताई ते जखिमएं दे तौले नरोए हाने दी कामना कीती। प्रियंका होरें आखेआ जे कुसै सभ्य समाज च हिंसा दी कोई थाह नेई हुंदी ते नेय आतंकवादी हमलें दी निंदेया लेई छड़े लफज गै काफी नेई हैन।

<><><><><><>

Samba-Search

सीमा सुरक्षा बल-बीएसएफ ते जम्मू-कश्मीर पुसै साम्बा जिले दे बन्ने आहले इलाकें च संदिग्ध गतिविधिएं पर तक्क रक्खने आस्तै अज्ज सांझे तौरा पर तपाशी अभियान चलाया। आकाशवाणी दे जम्मू संवाददाता दी रिपोर्ट मूजब घाटी च इक दे बाद इक आतंकवादी हमलें दी पच्छोकड़ै च एह तपाशी अभियान चलाया गेआ ऐ। सुरक्षाबलें दा एह सांझा तपाशी अभियान रामगढ़ सैक्टर दे सरहदी इलाकें च चलाया जा'रदा ऐ ते इस दरान अंतर्राष्ट्रीय बन्ने कन्नै लगदे केई महत्वपूर्ण ते संवेदनशील इलाकें गी खंगालेआ गेआ ऐ। तोआई साम्बा दे जिला मैजिस्ट्रेट होरें जिले च अंतर्राष्ट्रीय बन्ने दे 2 किलोमीटर दे इलाकें च बम्ब -पटाखें दी ब्रिकी ते इस्तेमाल उप्पर पूरी चाल्ली पाबंदी दा हुकम रसाल कीता गेआ ऐ। एह हुकम फौरी तौर पर अमल च आई जाहग ते अगले दऊं म्हीनें दी अवधि जां फही इसी परताई नेई लैते जाने तगर एह लागू रौहग।

<><><><><><>

Reasi-Search Operation

फौज, सी.आई.एस.एफ ते पुलस नै रियासी जिले दे पौनी इलाके च संदिग्ध गतिविधिं दी निगरानी लेई अज्ज दपेहरी इक तपाशी अभियान चलाया। घाटी च लड़ीवार आतंकवादी हमलें दी पच्छौकड़ै च एह तपाशी अभियान चलाया गेआ ऐ।

<><><><><><>

India-China diangagement

रक्षा अधिकारिं मूजब पूर्वी लद्दाख सेक्टर च डेमचोक ते डेपसांग दे मैदानें च भारती ते चीनी सेना गी पिच्छे हटाने दा कम्म शुरू करी दिता गेआ ऐ। समझौते दे मताबक भारती सेना नै अपने समाज कन्नै पिच्छे आना शुरू करी दिता ऐ। 21 अक्टूबर गी भारत नै घोषणा कीती ही जे चीन कन्नै समझौते दे तैहत पूर्वी लद्दाख च असल कब्जा रेखा दे कन्नै गश्त करने दे सरबंध च फैसला लैता गेआ ऐ जे 4 बरें शा मती चली दी फौजी तनोतनी खत्म होआ रदी ऐ। नमी दिल्ली च 24 अक्टूबर गी इक कार्यक्रम च बोलदे होई रक्षा मंत्री होरें आखेआ जे दौनें देशें बश्कार ते आपसी सुरक्षा दे उसूलें पर आधारित जमीनी स्थिति गी बहाल करने आस्तै आम सहमति पर पुज्जे न। उनें आखेआ जे एहदे च रिवायती इलाकें च गश्त ते मवेशिं गी चराने दी गतिविधिं गी बहाल कीता जाना बी शामिल ऐ। सिंह होरें सकारात्मक नतीजे आस्तै लगातार गल्लबात करने दे रस्ते गी महत्वपूर्ण दस्सेआ कीजे एहदे कन्नै सवेले या चिरै हल जरूरत निकलदा ऐ। भारत ते चीन बश्कार कूटनीतिक ते सेना दौनें स्तरें पर गल्लबात चला'रदी ऐ तां जे असल कब्जा रेखा कन्नै लगदे किश थाहरें पर आपसी तनोतनी गी घटाया जाई सकै।

<><><><><><>

GoC Northern Command

फौज दी उत्तरी कमान दे जनरल आफिसर कमांडिंग-इन-चीफ लेफ्टिनेंट जनरल एम.वी सुचिंदरा कुमार होरें जम्मू-कश्मीर ते लद्दाख च एनसीसी दे 4 नमें युनिटें दी स्थापना दे सिलसिले च लाए गेदे समारोह दी प्रधानता कीती। नमें खड़े गेदे इनें युनिटें च उधमपुर च 6, जेएण्डके बटालियन एनसीसी, उधमपुर च गै 1 एयर स्कवार्डन एनसीसी, कुपवाड़ा च 7 जेएण्डके बटालियन एनसीसी ते कारगिल च 2 लद्दाख बटालियन एनसीसी शामिल न। इस मौके आयोजित इक संवाददाता सम्मेलन च लेफ्टिनेंट जनरल एम.वी सुचिंदरा कुमार होरें दस्सेआ जे जम्मू-कश्मीर च पिछले 5एं बरें दौरान 720 आतंकवादिएं दा सफाया कीता गेआ ऐ। उनें इब्बी दस्सेआ जे भारत ते चीन दे कूटनीतिक ते फौजी वार्ताकार बक्ख-बक्ख मंचें पर इक-दुए कन्नै नेइमां संपर्क स्थापित करियै अगगे बधै करदे न। उनें गलाया जे नतीजतन भारत-चीन बन्ने पर असल कब्जा रेखा कन्नै लगदे अगेत्रें इलाकें च फौजी गश्त गी लेइयै बी समझौता मुमकन होई सकेआ ऐ।

<><><><><><>

Banihal-Medical

औंदी स्यालें दी रूतै दे मददेनजर दूर-दरेडे ग्राएं दे बसनीकें दी मेडिकल सुविधाएं तोहड़ी पुज्ज यकीनी बनाने दे मकसद कन्नै ते 9में आयुर्वेद दिवस कोला पैहले आहले कार्यक्रमें दे तैहत आयुष निदेशालय नै एनजीओ बनिहाल दे सैहयोग कन्नै अज्ज बनिहाल च इक्क बड्डे मेडिकल कैंप दा सरिस्ता कीता। 9में आयुर्वेद दिवस दे मददेनजर समूलचे रामबन जिले च केई कार्यक्रमें दी श्रृंखला

दा आयोजन कीता जा करदा ऐ। अज्ज लोआए गेदे मेडिकल कैंप दा उद्घाटन आयूष दे मेडिकल अफसर ते बनिहाल दे नोडल अधिकारी डॉ. बशीर अहमद होरें कीता। इस मौके पर आकाशवाणी कन्नै खास गल्लबात करदे होई उनें आखेआ।

<><><><><><>

PM-Modi Germany

भारत ते जर्मनी नै ग्रीन हाईड्रोजन थमां नवीनीकरण ते तकनीक दे क्षेत्र च अज्ज केई सहमति पत्रें ते समझौतें पर हस्ताक्षर कीते। इनें सहमति पत्रें ते ज्ञापनें दा प्रधानमंत्री नरेंद्र मोदी ते जर्मनी दे चांसलर ओलाफ शोल्ट्स हुंदी मौजूदगी च आदान-प्रदान कीता गेआ। इक संयुक्त प्रेस बयान च प्रधानमंत्री नरेंद्र मोदी होरें यूक्रेन ते पच्छिमी एशिया च चला रदे संघर्ष दे संदर्भ च भारत दे शांति बहाली दी बचनबद्धता गी दोहरायां उनें आखेआ जे एह संघर्ष भारत ते जर्मनी आस्तै चिंता दा विशे ऐ ते भारत दा म्हेशां कोला नजरिया रेया ऐ जे जंग कुसा बी मसले दा हल नेई ऐ। प्रधानमंत्री मोदी होरें दस्सेआ ऐ जे जर्मनी नै हुनरमंद भारती पेशेवरें आस्तै सालाना वीजा कोटा 20 ज्हार थमां बढ़ाईए 90 ज्हार करने दा फैसला लैता ऐ। उनें आखेआ जे एह फैसला जर्मनी च भारती हुनरमंदें दी जरूरत गी पूरा करने ते भारत कन्नै आर्थिक सहयोग बढ़ाने दे मकसद कन्नै लैता गेआ ऐ। एहदे कन्नै भारतीयें आस्तै जर्मनी च नौकरिएं दे मौके बढ़उन ते दौनें देशें बश्कार आर्थिक तालमेल ढूंगा होग।

<><><><><><>

Jitendra-Singh Homeopathy

कठुआ च नमं मंजूर कीते गेदे होम्योपैथी कॉलेज गी अपना पैहला शैक्षणिक सत्र 63 छात्रं दे दाखिले कन्नै शुरू करने आस्तै अधिकारिक मंजूरी मिली गई ऐ। इस कॉलेज गी डॉ. जतिंद्र सिंह हुंदी गुजारश पर प्रधानमंत्री नरेंद्र मोदी होरें आयुष मंत्रालय दे जरिए मंजूरी दिती ही। जतिंद्र सिंह होरें सोशल मीडिया साइट पर इसी जम्मू-कश्मीर दे लोकें आस्तै सेहत ते स्वास्थ्य सुविधाएं दे क्षेत्र च महत्वपूर्ण दस्सेआ ऐ। उनें आखेआ जे 10 मार्च 2024 गी उनें कॉलेज दी साइट दा दौरा लाया हा ते एह कॉलेज छात्रं आस्तै वैकल्पिक दवाइएं दे क्षेत्र च पढ़ाई करने दा अवसर देग। डॉ. जतिंद्र सिंह होरें आखेआ जे इस कॉलेज कन्नै क्षेत्र च डाक्टरी शिखा हासल करने आस्तै नमां थाह उपलब्ध होग ते एहदे कन्नै दवाइएं दी बक्ख-बक्ख पद्धतिएं गी इकट्ठे रलाने ते पूरे-पराते स्वास्थ्य सेवाएं दे विकास दे धेड़्यै गी पूरा करने बक्खी इक गैई पुट्टी जा'रदी ऐ।

<><><><><><>

JK-Darbar Move

अवामी इत्तेहाद पार्टी दे प्रधान ते लोकसभा सांसद इंजीनियर रशीद नै जम्मू-कश्मीर च 6एं-6एं महीनें होने आहली दरबार मूव दी प्रथा गी परतियै बहाल करने दी मंग गी लेइये अज्ज विरोध-प्रदर्शन कीता। दरबार मूव दी प्रथा सन् 1872 थमां लेइयै 2021 तगर चलदी रेई। एहदे तैहत सिविल सैक्रेटेरिएट ते होर दुए सरकारी दफ्तर 6 महीने जम्मू ते 6 महीने श्रीनगर ते 6 महीने जम्मू थमां कम्म करदे हे। सांसद रशीद नै अपने समर्थकें दे कन्नै बरोध प्रदर्शन करदे होई प्रधानमंत्री नरेंद्र मोदी ते मुखमंत्री उमर अब्दुल्ला होरें गी गुजारश कीती ते एह हवाला दिता जे

दरबार मूव जम्मू ते कश्मीर दौनें खितें दे लोके बशकार सांस्कृतिक जुड़ाव आहली इक प्रथा ही लेहाजा इसी ब्हाल कीता जाना लोड़चदा ऐ।

<><><><><><>

MLA-Bani

बनी थमां विधायक डॉ. रामेश्वर सिंह होरें अज्ज कठुआ दे सीएमओ डॉ. विजय रैना हुंदे नै मिलियै उनेंगी कठुआ जिले दे बनी इलाके च मती सारी डिस्पेंसरिएं ते सेहत केंद्रें च इलाज-मुआलजे आहली माड़ी सेवाएं बारै जानकारी दिती। उनें आखेआ जे सेहत ढांचे च सुधार दी फौरी लोड़ ऐ कीजे बनी दे मते सारे सेहत केंद्रें च अमले ते मशीनें दी बी कमी ऐ। आकाशवाणी समाचारक न्ने गल्ल करदे होई उनें आखेआ।

<><><><><><>

Drug

समाज कल्याण, शिक्षा, सेहत ते डॉक्टरी शिक्षा मंत्री सकीना इतू होरें अफसरें गी जम्मू-कश्मीर च नशाखोरी दे खतरे खिलाफ सख्त कार्रवाई शुरू करने आस्तै आखेआ ऐ जेदे कन्ने औने आस्तै आखेआ ऐ जेदे कन्ने औने आहिलिएं पीढ़िएं गी इस खतरे थमां बचाया जाई सकै। मंत्री होरें एह गल्ल समाज कल्याण विभाग कन्ने अपनी पैहली बैठक दौरान आक्खी। एह बैठक विभाग दी कारकरदगी जानने आस्तै लाई गई ही। बैठक दौरान सकीना इतू होरें अधिकारिएं गी दुए विभागें दे अधिकारिएं कन्ने रलिए कम्म करने आस्तै आखेआ तां जे समाज थमां इस नशाखोरी गी खत्म

कीता जाई सकै। मंत्री होरें अधिकारिं गी हर जिला ते उपजिला अस्पताल च नशामुक्ति केंद्र स्थापित करने दे कम्म गी शुरू करने आस्तै आखेआ तां जे नशे दे चंगुल च फंसे दे लोकें गी बचाया जाई सकै।

<><><><><><>

DC-Kisthwar

उपायुक्त किशतवाड़ राजेश कुमार श्रवन होरें अज्ज जिला शिड़क सुरक्षा समिति दी बैठक दी अध्यक्षता कीती। बैठक दौरान उनें शिड़क सुरक्षा आस्तै कीते जा'रदे कम्में दा जायजा लैता जियां शिड़क सुरक्षा कनून गी लागू करना, क्रैश वैरियर लाना, शिड़कें पर दिशाएं ते माइं दी जानकारी आस्तै बोर्ड लोआना, इंशोरेंस बीमा दा जल्द नबेड़ा ते रफ्तार सीमा बारै स्कूल, कालेजें दे छात्रें गी जागरूक करना शामिल ऐ। डी.सी किशतवाड़ होरें एआरटीओ गी निर्देश दिते जे ओह रडार निगरानी गी कायम रकखन ते जिले च व्यवसायिक ते निजी गड्डिएं दा डाटा सांझा करन। उनें डरैवरें दी बिच्चा-बिच्चा तालिए जांच करने, ड्राइविंग इंस्टीच्यूट पर तक्क रखने, व्यवसायिक गड्डिएं च 100 फीसदी कैमरा लोआने ते गड्डिएं दी नियमित जांच पर जोर पाया।

<><><><><><>